

FUNDACIÓN FRAGAS DO MANDEO

Balance económico e de xestión

Exercicio 2016

O día 6 de xullo de 2010 constituíuse Fragas do Mandeo como entidade de custodia do territorio con fins de conservación da natureza da comarca de As Mariñas. Rematado o sétimo ano natural, publica este informe de acordo coa lexislación vixente e seguindo a política de transparencia nas contas e na xestión.

Balance de xestión

No sétimo exercicio da entidade, do mesmo xeito que no ano anterior, seguiu incrementando considerablemente a superficie custodiada baixo distintos tipos de acordos. Aínda que se adquiriron dereitos soamente sobre 4 parcelas, o incremento total da superficie foi do 26 %, principalmente grazas a un novo acordo de custodia do territorio mediante un convenio co Concello de Coirós, que abrangue tres parcelas e conta cunha vixencia de 50 anos.

Continuouse coas actividades tendentes á difusión da actividade e dos obxectivos da entidade, e a divulga-la custodia do territorio como instrumento xurídico para a conservación da natureza. Mantívose actualizada a páxina web, incrementáronse os seus contidos e tódolos meses ofreceuse nova información no blog de noticias. Paralelamente participouse en diversos eventos e organizouse a *V Semana de Custodia do Territorio nas Mariñas Coruñesas e Terras do Mandeo*, na que interviñeron diversos expertos nas ciencias naturais. Os doadores e as asociacións colaboradoras mantivéronse informadas dos avances efectuados.

Ademais do convenio de custodia do territorio, asinouose tamén un convenio coa Universidade da Coruña para que os seus alumnos realicen prácticas baixo o sistema aprendizaxe-servizo en zonas custodiadas ou apadriñadas por Fragas do Mandeo. O mellor coñecemento destes enclaves redundará nunha maior eficacia nas accións de custodia.

Realizáronse dúas mesas informativas e rastrillos solidarios como medio de ter presenza na rúa difundindo os obxectivos da entidade, e para lograr fondos económicos adicionais.

O patrimonio inmobiliario veuse incrementado nunha parcela, grazas a unha doazón. Dende un punto de vista contable significou un aumento do 10,8 % respecto do ano anterior. No caso do activo corrente, este aumentou significativamente (62 % de incremento) debido a que non se fixeron investimentos en parcelas durante o exercicio.

Dotación fundacional e recursos

A dotación fundacional mantense coma inicialmente, pero aféctase a parcela doada. Esta nova parcela está situada no concello de Coirós.

A fin de ano, a extensión das parcelas en propiedade que forman parte da dotación fundacional, ou foron afectadas permanentemente ós fins fundacionais polo padroado, é de 92.005 m². No tocante ó activo non corrente, incrementouse en 7.016,91 euros (un 14 % máis), totalizando a fin de ano os 57.416,06 euros.

Ingresos

Os ingresos do ano 2016 divídense entre as doazóns en efectivo e a doazón dunha parcela polos seus dous propietarios.

Considerando soamente as primeiras, amosarían unicamente un lixeiro decrecemento respecto do ano anterior no caso de que descontáramos o excepcional ingreso ocorrido no 2015: a subvención do Agader para a restauración ecolóxica da parcela Espenuca. Aínda que esta fonte de ingresos é unha excelente oportunidade da que debería sacarse partido sempre que se poida, no 2016 non foi posible ó non existir ningún proxecto en marcha no que as súas características permitiran cumprir en prazo coas bases da convocatoria desa subvención pública.

Esta categoría de subvencións teñen carácter finalista e son un recurso para as actuacións de mantemento das parcelas custodiadas e para as actividades de voluntariado ambiental. Lamentablemente, seguen sen convocarse subvencións gobernamentais que permitan financiar acordos de custodia, tales como os de adquisición de parcelas.

En conxunto as fontes de ingresos seguen a presentar diversidade, compensándose as fluctuacións respectivas. A independencia respecto do sector público vese reflectida no feito de que a única subvención pública recibida supón aproximadamente a sexta parte dos ingresos (17 %).

Lamentablemente as doazóns en efectivo de particulares baixaron un 12 %. Se o conxunto dos ingresos foi afectado pola subvención do Agader, neste apartado o motivo foi unha doazón puntual elevada no 2015, que obviamente non se repetiu no presente exercicio. Descontada esta doazón extraordinaria, podería falarse dun mantemento das doazóns grazas á fidelidade dos doadores malia a falta de estímulos (non se mercaron parcelas no período). Supoñen o 48 % dos ingresos e foron asumidos por 37 doadores que achegan unha media de 129,90 euros por persoa. Os seguintes capítulos en importancia son as asociacións colaboradoras (19 %), a actividade propia (10 % do total) e as doazóns empresariais (1,5 %). No segundo caso, ese apartado está conformado polos donativos das mesas e rastrillos que sumaron 801,43 euros, máis os 182 euros das minutas dun curso e dunha actividade.


No apartado de doazóns de entidades colaboradoras, aínda que en liñas xerais a maioría mantén cifras similares ás de anos anteriores, duplicáronse os ingresos grazas a unha achega extraordinaria.

Por último, indicar que o nivel de ingresos propios caeu motivado pola cancelación de tres rastrillos e mesas informativas por impedi-la súa realización as inclemencias meteorolóxicas.

Resumindo: Descontando a subvención do Agader do ano 2015, en conxunto os ingresos en efectivo caeron un 9,6 % con respecto do exercicio anterior, pero mantéñense por riba doutros anos.

Ingresos dinerarios	Ano 2016	Ano 2015
Doazóns de particulares	4.806,20	5.432,00
Donativos mesas	801,43	1.963,96
Doazón da A. C. Lar de Unta	200,00	214,50
Doazón da A. C. Roxín Roxal	300,00	200,00
Doazón da A. C. O Rabo do Galo	0	300,00
Doazón do G. N. Hábitat	300,00	100,00
Doazón Escola de Tempo Libre Querqus	101,00	0
Doazón Erva	1.000,00	0
Subvención Deputación da Coruña e outras	2.229,43	1.248,67
Subvención Agader	0	6.838,76
Empresas	150,00	1.550,64
Formación	182,00	130,00
Xuros bancarios	0	0
Total (euros):	10.070,06	17.978,53


Ingresos 2016



Ingresos 2010-2016



Evolución anual dos ingresos




Investimentos e gastos

O exercicio do 2016 está caracterizado por unha contención nos investimentos e gastos. A sinatura dun novo convenio de custodia do territorio co Concello de Coirós, co obxectivo de crear a Reserva de Anfibios do Catorce, creou a necesidade de aumentala liquidez para poder afrontar no ano 2017 determinadas obras nesta reserva (aínda que se sufraguen cunha subvención, precísase liquidez para pagar por adiantado as facturas). Consecuentemente, non se mercaron parcelas no exercicio.

Investimentos e gastos	Ano 2016	Ano 2015
Adquisición de fincas *	187,69	1.588,02
Proxecto Espenuca	0	7.490,23
Proxecto Sobrado	0	3,00
Proxecto Reserva do Catorce	20,00	0
Proxecto Reserva do Olo da Roda	20,02	20,02
Equipamento	2.515,99	2.470,63
Accións de voluntariado	350,00	0
Gasto corrente	661,98	659,77
Total (euros):	3.755,68	12.231,67

* Inclúe os gastos aparelados de notaría e rexistro da parcela doada.


Investimento e gasto 2016



Investimento e gasto 2010-2016



Evolución anual dos investimentos e gastos



O valor do equipamento inventariable mercado acadou a cifra de 2.515,99 euros, sendo a parte máis importante a adquisición dunha desbrozadora forestal e ferramentas varias. Aínda que se financia mediante fondos propios, cóntase con recuperar o 80 % do seu valor no seguinte exercicio grazas a unha subvención finalista da Deputación da Coruña. Estas subvencións permitiron dotarse nos últimos anos dun equipamento imprescindible para as accións de voluntariado. A nivel contable o gasto é realmente inferior, pois este equipamento será amortizado durante 4 anos, aínda que a súa utilidade na realización de actividades de voluntariado ambiental previsiblemente se prolongará por moitos anos máis.

Aparece unha nova partida respecto do ano anterior, os gastos nas accións de voluntariado (seguros de accidentes e de responsabilidade civil), xa que até o momento eran sufragados por unha entidade colaboradora.

Gasto corrente

A cifra total de gasto corrente ten un valor aproximado ó do ano anterior, supoñendo un 6,6 % dos ingresos en efectivo do ano. Esta porcentaxe é baixa para unha ONG, sendo incluso inferior á media do período 2010-2016 (8,9 %). Nembargante, supera a cifra porcentual do ano anterior debido a que naquel exercicio os ingresos foron significativamente máis elevados grazas á subvención do Agader, o que redundou nun menor peso proporcional do gasto corrente.


Tal como se previra no anterior exercicio, obtívose unha mellora significativa no apartado de telefonía grazas á modificación do contrato, que reduciu as facturas mensuais a partir de novembro do 2015.

Aparece unha nova partida referida ó necesario seguro de responsabilidade civil da entidade, do que se carecía até o momento.


Hai que salientar, como en anos anteriores, a ausencia de gastos en nóminas, pois son os voluntarios os que asumen todo o traballo, tanto interno como nas zonas custodiadas. Tamén grazas á súa xenerosidade, o resto dos capítulos do gasto corrente son moi reducidos, contabilizándose como nulos os gastos de local, auga, electricidade, limpeza, mantemento, ADSL, quilometraxe, equipamento informático ou funxibles. O mesmo ocorre co deseño e a programación da web (valorados en 15.086 euros), os contidos da web e as súas traducións (valorados en 38.906 euros), a presenza nas redes sociais, os desprazamentos, a administración e os trámites oficiais, pois todos tiveron custo cero para a entidade.

Gasto corrente	Ano 2016	Ano 2015
Seguro entidade	103,50	0
Telefonía	248,70	449,71
Aloxamento e dominios de Internet	86,93	69,34
Papelería	50,67	60,73
Gastos varios	107,72	12,08
Comisións bancarias	23,64	37,03
Taxas	40,82	30,88
Total (euros):	661,98	659,77

Gasto corrente 2016: 6,6 %




Evolución da porcentaxe de gasto corrente




A evolución dos fondos de conservación e de actividade

Na gráfica seguinte pode observarse a evolución do fondo Conservación, efectivo destinado exclusivamente a abona-lo importe das parcelas que se mercan. A necesidade de ter liquidez no 2017 para adianta-los pagos das obras na Reserva do Catorce, que se prevé sufragar cunha subvención, levou a que presente a fin de ano unha cifra elevada pendente de investimento, que poderá ser executada no seguinte exercicio.

Evolución do fondo Conservación



Evolución do fondo Actividade



Os ingresos da actividade propia cubriron todo o gasto, mantendo así o principio de destinalo 100 % das doazóns a abona-lo importe das parcelas de interese ambiental que se merquen. Neste ano, a suma do gasto corrente, dos gastos de transmisión da parcela doada (notaría e rexistro), dos proxectos en marcha, das accións de voluntariado e da adquisición de equipamento, non superou os ingresos por actividade propia e por subvencións. O superávit de 542,82 euros (55 % dos ingresos por actividade propia) quedan no fondo para actividades futuras.


Adquisición de fincas

Igual que no exercicio anterior, no 2016 a ampliación da superficie custodiada veuse dominada pola sinatura dun novo convenio de custodia do territorio co Concello de Coirós. Neste acordo incluíronse 3 parcelas de titularidade municipal que suman unha superficie de 50.231 m², cedéndonos gratuitamente o seu uso e xestión por un período de 50 anos.

A superficie total adquirida supuxo unha cifra moi modesta en superficie, reducíndose a unha parcela doada de 3.050 m² no lugar de Chelo (Coirós). Dada a súa localización, o seu valor contable é moito máis alto que nas zonas onde se adquiriron anteriormente. O custe de transmisión desta finca foi de 187,69 euros, cifra na que se inclúen os gastos notariais e de rexistro.

Sumando as fincas cedidas no convenio e a doada, o incremento da superficie custodiada foi do 26 %, permitindo acadar a cifra total de 254.628 m².

Superficie custodiada (m²)



Tal como se adiantou, o motivo polo que a superficie en propiedade soamente se viu aumentada pola parcela doada foi a sinatura durante o exercicio do convenio de custodia do territorio co Concello de Coirós para a creación da Reserva do Catorce. As obras que deberán acometerse nela no ano 2017 fixeron preciso prever a disposición de liquidez, necesaria para afrontar os pagos adiantados das facturas que posteriormente serán cubertas por unha subvención.

Mantemento de propiedades

As tarefas de mantemento do ano 2016 estiveron condicionadas polos dous convenios co Concello de Coirós.

Por unha banda, continuáronse as accións na parcela Espenuca, de 16.846 m² de superficie. Mediante voluntariado, repasáronse os rebrotes de eucaliptos en tres ocasións, secando os cepos que sobreviviran e arrincando os que naceron de semente.

Na Reserva de Anfibios do Catorce, de 50.231 m² de superficie, acometéronse os primeiros traballos de mellora do hábitat, consistentes na retirada de lixo, eliminación de catro especies exóticas invasoras, recollida e amoreado de toda a ramallada de eucalipto abandonada na última corta, control de rebrotes e secado de cepos de eucaliptos, roza dos camiños e do exceso de mato en determinadas zonas, construción de catro novas charcas e renovación de dúas máis retirando a vexetación que as atacaba.

Nas parcelas propiedade da Fundación en Os Velloos cortáronse eucaliptos, elimináronse os seus rebrotes e secáronse os seus cepos, controlouse a biomasa constituída por restos forestais e toxos para evitar lumes forestais, preparouse o terreo para que se reforeste con especies autóctonas e fíxose unha barreira contra a erosión. Nas parcelas arrendadas e mercadas para constituí-la Reserva do Olla da Roda, continuouse a recoller lixo e a erradica-la flora exótica invasora, eliminando eucaliptos, ligustros, plátanos de sombra e outras especies exóticas.

Continuouse co mantemento do observatorio ornitolóxico situado nunha das nosas fincas da lagoa de Sobrado, cortando os salgueiros que tirou contra el o vento, podendo o resto dos que medran diante para que non impidan a observación e cortando a herba ó seu redor (non foi preciso realizar reparacións). As dúas fincas custodiadas en Sobrado visitáronse periodicamente, tanto para o mantemento como para limpa-lo observatorio, totalizando no ano 5 visitas.

Apadriñamento

Paralelamente á custodia das dúas fincas de Sobrado, o apadriñamento da lagoa traducíuse na recollida de lixo na súa contorna, no aparcadoiro e no tramo de camiño xacobeo que pasa ó seu carón en case tódalas visitas.

Dentro do espazo natural protexido ZEC Betanzos-Mandeo actuouse en varios puntos. Na praia da Alameda (concello de Miño), os voluntarios recolleron en varias xornadas o lixo e erradicaron especies exóticas invasoras que están a poñer en risco a súa biodiversidade (*Cortaderia selloana*, *Cotula coronopifolia*, *Crocasmia x crocosmiiflora*, *Myoporum laetum*, *Cyperus eragrostis*, *Conyza canadensis* e *Aster squamatus*).

A organización da terceira eco-regata en Betanzos permitiu recoller 15 m³ de lixo na marisma.

No río Mendo, entre as pontes de As Moas e a de Taibo, os voluntarios recolleron todo tipo de refugallo nas dúas beiras e eliminaron *Crocasmia x crocosmiiflora* e *Phyllostachys sp.*

No río Mandeo, no tramo entre a pontella de Chelo e a ponte de Teixeira, os voluntarios recolleron lixo en repetidas ocasións e eliminaron varias plantas exóticas invasoras (*Crocasmia x crocosmiiflora*, *Tradescantia fluminensis*, *Acacia melanoxylon*, *Cyperus eragrostis*, *Buddleja davidii* e *Hydrangea sp.*).

Tamén se continuou co apadriñamento da praia Grande de Miño, próxima ó espazo natural, recollendo lixo e erradicando varias especies exóticas invasoras (*Carpobrotus edulis*, *Crocasmia x crocosmiiflora* e *Vinca difformis*).


Voluntariado

A entidade contou con suficiente voluntariado, aínda que dispoñer dun maior número permitiría abordar máis actuacións. Acabou o ano coa colaboración de 152 voluntarios distintos, cifra á que hai se sumar os 17 voluntarios do Campo de Traballo Internacional Monte da Espenuca (promovido por Fragas do Mandeo e solicitado polo Concello de Coirós), o apoio de catro asociacións e a colaboración da empresa CPR Gestión nas tarefas de administración. O número de horas dedicadas polo voluntariado equivale a 381 xornadas laborais de 8 horas.

Difusión da entidade

A difusión da entidade a través de Internet seguiu sendo o principal recurso, por ser un medio con custos moi reducidos. O total de contidos da web acadou a final de ano unha extensión de 112.372 palabras para a versión en galego. Sumando os textos xa traducidos ó castelán, inglés e alemán, totalízase unha extensión de 335.415 palabras.

Dimensión da web
(en palabras)




Ó longo do ano publicáronse 37 entradas na sección de noticias, cunha media de 3 por mes. A través dela anunciáronse as actividades programadas e a participación da entidade en diversos foros.

A final de ano contabilizáronse 59.732 visitas realizadas por 30.288 visitantes distintos, cun total de 361.655 páxinas servidas. A media mensual de visitantes distintos foi de 2.524 persoas, o que significa que se logrou un incremento anual do 32 % respecto do ano anterior. Pero este aumento non afecta de xeito similar ó número de visitas (soamente aumentou un 14 %) e aínda non acada a cifra lograda no 2014.


O número de páxinas servidas por visitante distinto mantense en cifras similares (11,9). Pero o incremento de visitantes afecta notablemente ó tráfico de datos, pois o total de páxinas servidas aumenta en case 100.000 páxinas, cando ese total levaba estabilizado tres anos. O posicionamento da web de Fragas do Mandeo nos buscadores seguiu a ser óptimo (aínda que mellorable cando se buscan determinados termos relacionados coa súa actividade).

Uso da web

361.655 páxinas servidas en 2016



Tráfico da web



Para promover o voluntariado ambiental na bisbarra de As Mariñas, e así poder comunicar cos potenciais participantes nas actividades programadas pola entidade, continuouse co mantemento da conta na rede social Facebook (www.facebook.com/voluntariadomandeo/). No exercicio publicáronse 21 comunicacións que suman 3.654 palabras e 18 imaxes, alcanzando a 35.356 persoas.

A presenza nos medios de comunicación segue a ser modesta. Como novidade, participouse en dúas xornadas do programa *Bicherías* da Radio Galega. A creación da Reserva de Anfibios do Catorce foi recollida nas cadeas TVG e V Televisión, en Radio Galega, Radio 1, Radio 5 e Cope, no xornal *La Opinión – Coruña*, e en diversos medios electrónicos.

Para dar a coñecer a entidade noutras vilas da bisbarra, Fragas do Mandeo fixo presentacións sobre a súa actividade e fins en Vigo (organizada polo Colectivo Matogueira), en Carral (pola Asociación Eco-Cultural Lacrar), en Teixeira (pola Escola de Tempo Libre Querqus), e en Coirós (pelo Grupo de Senideirismo de Cambre e pola Escola de Tempo Libre Querqus).

Promoción da custodia

A promoción e difusión da custodia do territorio, coma en anos anteriores, seguiu a facerse a través de varias liñas de traballo:

Participación en eventos: A entidade participou na xornada *Custodia do Territorio e Administracións Públicas* (Lugo), nas xornadas do *Proxecto Glamurs* (Pazo de Mariñán, Bergondo) e no *III Encontro de Troco da Rede Galega de Sementes* (Betanzos).

Organización da semana de custodia: Fragas do Mandeo encargouse de organizar, coa colaboración da Asociación de Desenvolvemento Rural Mariñas-Betanzos, a *V Semana de Custodia do Territorio nas Mariñas Coruñesas e Terras do Mandeo*, co obxectivo de promover o voluntariado ambiental e de realizar actuacións de conservación en distintos puntos da bisbarra.

Participación na Rede Galega: Fragas do Mandeo continuou a ser parte activa na Rede Galega de Entidades de Custodia do Territorio, mediante a que estas organizacións temos unha representación ante a Administración e a sociedade en xeral. Esta participación traducíuse na presenza en reunións coas entidades afiliadas e no *Encontro da Rede Galega de Custodia do Territorio* (Agolada).

Na páxina web seguen a manterse documentos e información actualizada relacionada coa custodia do territorio, aparte das noticias ó respecto, de maneira que o público poida informarse e resolver as súas dúbidas nesta materia.

Política lingüística

O idioma de uso habitual na entidade é o galego. Seguindo a política de non discriminación lingüística, os doadores e mailos voluntarios poden escolle-lo idioma de relación coa entidade.

O usuario da web da entidade pode escoller entre catro idiomas (galego, castelán, inglés e alemán). Tódalas páxinas da web están traducidas do galego ó castelán no momento da súa publicación. As traducións ó inglés e ó alemán van avanzando ó ritmo que poden os tradutores voluntarios. A final de ano o 87% das entradas están traducidas.

No caso da conta de Facebook, soamente se usa o galego, pois o software non facilita ter versións en distintos idiomas.

Política de igualdade

Grazas a non existir actitudes ou políticas discriminatorias, e tamén debido ó maior volume de participación, as diferenzas nas estatísticas por sexo que aparecían nos primeiros anos diminuíron. No voluntariado a relación foi aproximada (1,20 homes por cada muller), pero esta cifra empeorou lixeiramente respecto do ano anterior sen atoparse ningún motivo que o explique.

Tamén se incrementa o desequilibrio nos doadores particulares, habendo actualmente 1,43 homes por cada muller. Pola contra, o importe medio das doazóns en metálico aproximouse (132 euros nos homes e 129 nas mulleres), cando no ano anterior a diferenza era moi significativa (227 euros nas mulleres e 107 euros nos homes).

Os representantes no padroado seguen a ser todos homes, malia renovarse durante o exercicio.

Planificación para o ano 2017

O padroado da entidade ten previsto centrarse no ano 2017 nas seguintes liñas de actuación:

- Continuar coa adquisición de parcelas nalgunha das tres zonas de alto valor ecolóxico nas ribeiras do ríos Mandeo e Mendo, nos concellos de Aranga, Coirós e Oza-Cesuras, para o que se contemplou no plan de actuación destinar 7.200 euros.
- Mantemento do observatorio e das fincas de Sobrado dos Monxes, para o que se contemplou no plan de actuación destinar 100 euros, en previsión de actos vandálicos e deterioracións naturais.
- Promoción da custodia do territorio en Galicia, mediante a participación en xornadas ou encontros que poidan seren sufragados con fondos alleos á entidade; participando na Rede Galega de Entidades de Custodia do Territorio (100 euros de cota); organizando a *VI Semana de Custodia nas Mariñas*, para a que —aínda que se contemplou no plan de actuación destinar 1.500 euros— buscarase financiamento externo; por último, a través da súa difusión na páxina web da entidade.
- Mantemento das zonas custodiadas (fincas cedidas ou adquiridas en Aranga, Coirós, Oza-Cesuras e Sobrado dos Monxes) e apadriñadas mediante voluntariado ambiental, coa eliminación da flora alóctona, retirada de lixo e reforestación con especies autóctonas, para o que se contemplou un gasto de 1.270 euros.
- Mantemento da difusión a través da web, do Facebook e de charlas (90 euros de custe previsto).
- Acometer diversas actuacións na Reserva de Anfibios do Catorce que non poden abordarse mediante voluntariado, no caso de lograr unha subvención que sufrague os gastos.

Aplicación dos principios de transparencia e boas prácticas

Dende o seu nacemento, Fragas do Mandeo ten a vontade de segui-los principios de transparencia e boas prácticas recomendados pola Fundación Lealtad, como mecanismo para garantir que se dea resposta ás demandas de información da sociedade.

1. Principio de Funcionamento e Regulación do Órgano de Goberno

- A. *“El órgano de gobierno estará constituido por un mínimo de 5 miembros.”*

Tal como regulan os estatutos, o padroado está composto por tres membros, en representación das tres entidades que participaron na creación de Fragas do Mandeo. Aínda que a recomendación é que debe estar constituído por un mínimo de 5 membros, considérase que o modesto tamaño da entidade non require máis membros dos que ten. Asemade, dado o seu carácter de representantes de entidades, significa a existencia dun segundo nivel de control da súa xestión.

- B. *“El órgano de gobierno se reunirá al menos 2 veces al año con la asistencia física o por videoconferencia de más del 50% de los miembros del órgano de gobierno.”*

O padroado reuniuse en xunta de goberno 8 veces no ano 2016, participando presencialmente tódolos seus membros. Adicionalmente, realizáronse outras reunións presenciais, e contactos permanentes por vía telemática.

- C. *“Todos los miembros del órgano de gobierno asistirán en persona o por videoconferencia, al menos, a una reunión al año.”*

Como se indica no punto B, tódolos membros do goberno asistiron presencialmente ás reunións máis dunha vez no ano.

- D. *“Respecto a los miembros del órgano de gobierno, serán públicos los nombres, profesión, cargos públicos y relación de parentesco y afinidad con otros miembros del órgano de gobierno y con el equipo directivo de la organización. Será público el currículum vitae de los miembros del equipo directivo. La organización hará públicas las relaciones que existan entre miembros del órgano de gobierno y los proveedores y co-organizadores de la actividad.”*

O nome, profesión e currículo dos membros do padroado están publicados na web. Non teñen relacións de parentesco entre si ou con provedores e co-organizadores.

- E. *“Sólo un número limitado de los miembros del órgano de gobierno podrá recibir ingresos de cualquier tipo, procedentes tanto de la propia organización como de otras entidades vinculadas. Este porcentaje será inferior al 40% de los miembros.”*

Ningún membro do padroado ou do voluntariado percibe ingresos da entidade, directa ou indirectamente.

- F. *“Los miembros del órgano de gobierno se renovarán con cierta regularidad.”*

Os estatutos contemplan a renovación periódica do órgano de goberno, téndose procedido á súa renovación no 2016.

- G. *“Existirán mecanismos aprobados por el órgano de gobierno que eviten situaciones de conflicto de interés en el seno del órgano de gobierno. Estos mecanismos serán públicos.”*

Están pendentes de elabora-los mecanismos de resolución dos conflitos de intereses no órgano de goberno.

2. Principio de Claridade e Publicidade do Fin Social

- A. *“El fin social estará bien definido. Deberá identificar u orientar sobre su campo de actividad y el público al que se dirige.”*

O fin social está definido no artigo 6 dos estatutos, e o público ó que se dirixe no artigo 11. Na páxina web explícanse en detalle, estando tamén dispoñible na mesma o texto íntegro dos estatutos.

- B. *“Todas las actividades que realice la organización estarán encaminadas a la consecución del fin social, de modo que la organización no lleve a cabo actividades que no estén explícitamente contempladas en sus Estatutos.”*

Tódalas actividades realizadas e programadas están contempladas no artigo 7 dos estatutos.

- C. *“El fin social será conocido por todos los miembros de la organización, incluidos los voluntarios y será de fácil acceso para el público.”*

Tódolos membros da organización, padroado e voluntarios, coñecen en detalle os seus fins sociais. O público ten acceso a eles na web da entidade.

3. Principio de Planificación e Seguimento da Actividade

- A. *“Existirá un plan estratégico o un plan anual que englobe toda la organización con objetivos cuantificables, cronograma y responsables. Serán públicos los objetivos relacionados con el área de proyectos.”*

Durante o ano 2016 seguiuuse o plan de actuación correspondente. Para o seguinte exercicio elaborouse o plan de actuación do ano 2017, onde se detallan datas e actividades, entregado á Consellería de Medio Ambiente e Ordenación do Territorio da Xunta de Galicia. A información sobre as actividades e as datas de realización vanse publicando na

web segundo vai concretándose a súa organización. Existe unha páxina específica na web respecto ás campañas en marcha, cos seus obxectivos e localización.

- B. *“La planificación tendrá que estar aprobada por el órgano de gobierno.”*

O plan de actuación foi aprobado por unanimidade polo padroado.

- C. *“Durante los últimos tres años, los programas habrán seguido una línea de trabajo específica.”*

Estase a segui-la mesma liña de traballo dende a creación da entidade.

- D. *“Contarán con sistemas formalmente definidos de control y de seguimiento interno de la actividad y de los beneficiarios. Estos estarán aprobados por el órgano de gobierno.”*

Os sistemas de control e seguimento están pendentes de redactar.

- E. *“La organización elaborará informes de seguimiento y finales justificativos de los proyectos que estarán a disposición de los financiadores.”*

En cada adquisición de fincas infórmase ós doadores da cantidade investida e dos metros cadrados mercados, indicándolles se foron utilizadas as súas doazóns e a cantidade de metros cadrados que se mercaron con elas. Con respecto á parcela arrendada ó Banco de Terras de Galicia, emitiuse o correspondente informe anual no primeiro trimestre do 2017.

- F. *“La organización contará con criterios y procesos de selección de proyectos y contrapartes aprobados por el órgano de gobierno.”*

Están pendentes de elaborar.

4. Principio de Comunicación e Imaxe Fiel na Información

- A. *“Las campañas de publicidad, captación de fondos e información pública reflejarán de manera fiel los objetivos y la realidad de la organización y no inducirán a error.”*

A web da entidade recolle fielmente toda a información existente. O folleto impreso para a campaña de publicidade e captación de fondos recolle información clara e fidedigna.

- B. *“Al menos una vez al año se informará a los donantes y colaboradores sobre las actividades de la organización.”*

Os doadores e colaboradores recibiron información periódica por correo electrónico. Se celebraron reunións coas directivas das asociacións doadoras (aquelas que non forman parte do padroado) para explica-las actividades e os avances da entidade.

- C. *“Son requisitos para llevar a cabo la comunicación de forma eficiente contar con correo electrónico institucional y página web propia en funcionamiento, con información de todas las actividades de la organización y actualizada al menos una vez al año.”*

A entidade conta cunha páxina web permanentemente actualizada, e enderezo electrónico xestionado diariamente.

- D. *“La organización pondrá a disposición de quien lo solicite la memoria anual de actividades y la memoria económica anual. La memoria anual de actividades y los estados financieros con su correspondiente informe de auditoría serán accesibles a través de la web.”*

O informe anual de balance económico e de xestión está publicado na web e accesible para todo o público, e así se fará co presente informe. Non se ten realizado a auditoría externa das contas polo reducido volume destas e o custo aparelado.

5. Principio de Transparencia no Financiamento

- A. *“Las actividades de captación de fondos privados y públicos, su coste y su recaudación anual (donaciones, socios y otras colaboraciones) serán públicos.”*

O balance de doazóns e a súa procedencia están recollidas neste informe. Non se fixo ningunha campaña de captación de fondos no ano 2016.

- B. *“Serán públicos los fondos recaudados con detalle de los principales financiadores, tanto públicos como privados, y las cantidades aportadas por los mismos.”*

Os fondos recadados están publicados neste informe, así como o nome das asociacións que fixeron doazóns. A máxima doazón dunha empresa foi soamente do 1 % dos ingresos, e a máxima dun particular o 4 %, polo que non se informa dos seus nomes.

- C. *“Será conocida la imputación de los fondos recaudados a la actividad de cada año, debidamente documentada.”*

No apartado económico deste informe detállase o destino dos fondos.

- D. *“En caso de solicitar datos personales, la organización incluirá en sus soportes de recogida de datos la información pertinente según la legislación vigente en materia de datos personales. La organización tendrá registrados sus archivos de socios y donantes particulares en la Agencia de Protección de Datos.”*

Está pendente de dar de alta o ficheiro de datos de doadores e voluntarios na Axencia de Protección de Datos. Na súa recollida infórmase dos dereitos de acceso, cancelación, rectificación e oposición que outorga a lei.

- E. *“Existirán criterios de selección de empresas y entidades colaboradoras aprobados por el órgano de gobierno.”*

Están pendentes de redactar.

- F. *“Los acuerdos de cesión del logotipo de la entidad a empresas e instituciones deberán estar formalizados por escrito. Las cláusulas de cesión del logotipo no serán confidenciales.”*

Non se cedeu o uso do logotipo a terceiros.

6. Principio de Pluralidade no Financiamento

- A. *“La organización deberá diversificar su financiación con fondos públicos y privados. En ningún caso los ingresos privados serán inferiores al 10% de los ingresos totales.”*

A meirande parte dos ingresos da entidade foron privados. As subvencións públicas recibidas supuxeron o 17 % dos ingresos, polo que non existe dependencia dos fondos públicos.

- B. *“La organización contará con una variedad de financiadores externos que favorezca la continuidad de su actividad. Ninguno de ellos aportará más del 50% de los ingresos totales de la organización de forma continuada durante los dos últimos años.”*

Ningún dos doadores ten achegado máis do 50 % dos ingresos. A doazón particular de maior importe en metálico supuxo o 4 % do total dos ingresos do ano; a doazón de asociación colaboradora de maior importe supuxo o 10 % do total, e a de empresa o 1 %.

7. Principio de Control na Utilización de Fondos

- A. *“Será conocida la distribución de los gastos de funcionamiento agrupados en las categorías de Captación de Fondos, Programas-Actividad y Gestión-Administración. Será además conocido el destino de los fondos desglosado por cada proyecto y línea de actividad de la organización.”*

O balance económico do presente informe detalla cada un dos apartados de gastos.

- B. *“Existirá un detalle de los principales proveedores y co-organizadores de la actividad. La organización contará con una Política de Aprobación de Gastos, así como criterios de selección de proveedores aprobados por el órgano de gobierno.”*

O baixo nivel de aprovisionamento da entidade fixo innecesario establecer unha política de aprobación de gastos e selección de provedores.

- C. *“La organización deberá preparar un presupuesto anual para el año siguiente con la correspondiente memoria explicativa y practicar la liquidación del presupuesto de ingresos y gastos del año anterior. El presupuesto y la liquidación estarán aprobados por el órgano de gobierno y serán públicos.”*

O padroado aprobou en reunión da xunta de goberno as contas do ano 2016, resumidas neste documento, e o presuposto para o ano 2017, que tamén se recolle nel.

- D. *“La organización no contará con recursos disponibles excesivos en los dos últimos años.”*

Todo o excedente do exercicio aplícase a reservas. As mesmas serán destinadas á compra de novas fincas que serán afectadas permanentemente ós fins fundacionais polo padroado en canto frutifiquen as negociacións en marcha e se rematen as obras na Reserva de Anfibios do Catorce.

- E. *“La organización no presentará una estructura financiera desequilibrada de forma continuada en los últimos tres años.”*

A estrutura financeira é equilibrada, estando ausentes os compromisos financeiros.

- F. *“Las inversiones deberán cumplir unos requisitos de prudencia razonable.”*

Non se teñen feito investimentos financeiros no presente ano, nin están previstos para os próximos.

- G. *“En el caso de contar con inversiones financieras, la organización contará con unas normas de inversión aprobadas por el órgano de gobierno.”*

Non se conta con investimentos financeiros, nin están previstos.

- H. *“Las inversiones en sociedades no cotizadas estarán relacionadas y ayudarán directamente a la consecución del fin social.”*

Non se teñen realizado investimentos en sociedades, nin están previstos.

- I. *“La organización respetará la voluntad de los donantes y se establecerán sistemas de seguimiento de fondos dirigidos. Los fondos procedentes de apadrinamiento se considerarán fondos dirigidos.”*

No ano 2016 a entidade non ofreceu a posibilidade de fondos dirixidos nin de apadrinamentos, dado que a súa misión é moi concreta e local. Os doadores teñen forma de saber con anticipación en que van investirse as súas achegas, por estar explicado na web da entidade.

8. Principio de Presentación das Contas Anuais e Cumprimento das Obrigas Legais

- A. *“La organización acreditará el cumplimiento de las obligaciones legales ante la Administración Tributaria, Seguridad Social y Protectorado o Registro correspondiente.”*

A entidade está exenta do Imposto de Sociedades, remitiu os certificados de doazóns ós doadores, non ten obrigas coa Seguridade Social por non ter empregados, ten entregada

a documentación requirida ó protectorado da Xunta de Galicia e conta co certificado de rexistro.

- B. *“La organización elaborará las cuentas anuales de acuerdo con el Plan General de Contabilidad de Entidades sin Fines Lucrativos que serán sometidas a auditoría externa y aprobadas por la Asamblea General o el Patronato.”*

A entidade ten elaboradas as contas segundo o *Plan Xeral de Contabilidade das entidades sen fins lucrativos*, anexas a este informe, aprobadas polo padroado. Non se ten feito auditoría externa por redución de custos e polo baixo nivel de operacións.

9. Principio de Promoción do Voluntariado

- A. *“La organización promoverá la participación de voluntarios en sus actividades.”*

No ano 2016 a Fundación mantivo aproximadamente o mesmo número de voluntarios que no ano anterior (161 no 2015 e 152 neste exercicio).

Para outras actividades, como atende-las mesas informativas e rastrillos, invitouse con antelación ós interesados en participar, contando sempre con suficiente persoal.

A participación do voluntariado traduciu-se nunha dedicación equivalente a 381 xornadas laborais de 8 horas.

- B. *“Estarán definidas aquellas actividades que están abiertas a ser desarrolladas por voluntarios. El documento en el que se recojan dichas actividades será público.”*

As actividades nas que puido participa-lo voluntariado foron publicadas na web segundo foi concretándose a súa programación.

- C. *“Se contará con un plan de formación acorde con las actividades designadas, a disposición de los voluntarios.”*

Antes do inicio de cada actividade, os voluntarios recibiron as debidas explicacións, non precisándose de maior planificación pola súa simplicidade.

- D. *“Los voluntarios estarán asegurados.”*

As actividades de campo nas que participaron os voluntarios estiveron cubertas por un seguro de accidentes e responsabilidade civil contratado por Fragas do Mandeo.